



續資治通鑑長編卷一百二十八

宋 李燾 撰

仁宗

康定元年秋七月乙卯詔臣僚赴官罷任所過山險之處量差軍士防送毋得過迎送人數之半

丁巳詔諸軍戍邊其在營家屬並給以茶鹽

戊午太常寺丞集賢校理李昭邁上太宗藩邸聖製三卷永熙政範二卷降詔褒諭

癸亥鄜延鈐轄張亢上疏曰舊制諸路部署鈐轄都監不過三兩員餘官雖高止爲一州部署鈐轄不預本路事今每路多至十四五員少不減十員皆兼路分事權均勢敵不相統制凡有議論互執不同按唐總官統軍

都統處置制置使各有副貳國朝亦有經略使排陣使請約故事別創使名每路軍馬事止三兩員領之其已係路分部署鈐轄都監者且仍舊職並屬新置使處分所貴事出于一又涇原一路自部署鈐轄都巡檢及城寨所部近六十餘處多者五七指揮少者一二指揮兵勢既分不足以當大敵若賊以二萬人爲二十溜而來多張聲勢以綴我軍然後以三五萬人大入奔衝則何以枝梧又比來主將與軍伍移易不定人馬強弱品配未均今涇原正兵五萬弓箭手二萬鄜延正兵不減六七萬若能預爲團結明定節制迭爲應援以逸待勞則烏合饑餒之眾豈能窺我深淺乎請下韓琦范仲淹分按逐路以馬步軍八千以上至萬人擇才位兼高者爲

總領其下分爲三將一爲前鋒一爲策前鋒一爲後陣
每將以使臣忠佐兩三人分屯要害之地若賊小入則
一將出大入則大將出量賊數多少又使鄰路出兵而
應接之此所謂常山蛇勢也今萬人以上爲一大將一
路又有主帥延州領三大將鄜州一大將保安軍及西
路巡檢德靖寨共爲一大將則鄜延路兵五萬人矣原渭
州鎮戎軍各一將渭州山外及瓦亭各一將則涇原路
五萬人矣弓箭手熟戶不在焉昨延州之敗蓋由諸將
自守不相爲援請令邊臣預定其法賊寇某處則某將
爲先鋒某將出某處爲奇兵某將出某處爲聲援某城
寨相近出敢死士某處設伏都司巡檢則各扼其要害
又令鄰路將取某路救應仍須暗以旂幟爲號昨劉平

救延州前鋒軍馬陷賊寨者四指揮平猶不知又趙瑜
領軍馬間道先進而趙振與王達等趨寨門至高頭平
踏白馬執賊張青蓋駐山東振麾兵掩襲乃其子瑜也
臣在山外策應未嘗用本指揮旂號自以五行支干別
爲引旂若甲子日本軍相遇則先者張青旂後者以緋
旂應之此是干相生也其干相尅支相生支干相生尅
亦如之蓋兵馬出入晝則百步之外不能相認若不預
爲之號必誤軍期又國家承平日久失於訓練今每指
揮藝精者不過百餘人其餘皆疲弱不可用且官軍所
恃者步人弩手爾臣知渭州日見廣勇指揮弩手三百
五十人其弩力及一石二斗者才九十餘枝其餘止及
七八斗止欲閱習時易爲力爾臣以跳鎧弩試之皆不

能張閱習十餘日僅得百餘人又教以小坐法亦十餘日又教以帶甲小坐法五十餘日始能服熟若安前弊而應新敵其有必勝之理乎又兵官務要張皇邊事劉平之敗正繇貪功輕進鎮戎軍最近賊境每探馬至不問賊之多少部署鈐轄知軍都監皆出至邊壕則賊已去矣蓋權均勢埒不肯相下若其不出則恐得怯懦之罪又諸路騎兵不能馳險要計其芻粟一馬之費可養步軍五人馬高不及四尺三寸者宜悉還坊監自今止留十之二餘以西川荆湖等路步人代之又比來諸班諸軍有授諸司使副至侍禁殿直者亦有白身試武藝而得官者諸路弓箭手生長邊陲父祖効命累世捍賊乃無進擢之路何以激勸邊民且用兵以來屢出無功

若一旦更議五路深入臣竊以爲未可且山界諸州城寨距邊止三四百里西夏之兵雖器甲精利其如戰鬪不及山界今使敵人不得耕牧畏首畏尾周顧不暇可令步人負十日糧又日給米一升爲湯飲馬軍給新粟四升草五分賊界草地亦可半資放牧新粟兼減輓運之半王師旣行使嘉勒斯賚及九姓回紇分制其後此蕩覆巢穴必矣又言陝西民差配之苦數倍常歲止如鄜州買駱駝驢騾牛羊紅花紫草橋瓦鞦轡箭翎白氊三事子羊皮裘牛皮筋角弓胎之類宜一切權罷仍令安撫司與逐州長吏減省他役顓應邊上科率及乞遣殿侍軍將各三十人駝驢各二百留其半河中以運鄜延保安軍軍須物其半留乾州或永興軍以運環慶涇

原鎮戎軍軍須物分轉運使一員專董其事又鄜州四路半當衝要嘗以閑慢路分遞鋪兵卒之半貼衝要二路每驛得百人每三人挽車載物二百五十斤至三百斤若團併船運邊計亦未至失備而民可以寬矣初亢請乘驛入對詔令手疏上之其後多施用者

乙丑遣刑部員外郎集賢校理同修起居注郭稹供備庫副使夏防使契丹告以方用兵西邊也議者謂元昊潛結契丹恐益爲邊患故特遣稹等諭意契丹主厚禮之與同出觀獵延稹射一發中走兎敵人愕視契丹主遣以所乘馬及他物甚厚防守贊子也補京兆府僧道信爲三班借職陝西都部署司指使本司言其習知邊事也

丙寅權御史中丞柳植言中丞知雜舊舉三院御史而
近歲乃詔兩制舉之請自今復下臺舉官如故事從之
己巳降捧日天武四廂指揮使象州防禦使鄜州副都
部署趙振爲白州團練使知絳州賊自正月攻圍塞門
寨振代范雍守延州有兵七千八百餘人按甲不動寨
中兵才千人屢告急五月初振始遣百餘人赴之寨遂
陷振嘗語人曰賊乘新勝必徑進苟延州勿支則陝西
未可量也方幸賊不至塞門雖危吾甯以大易小于是
都轉運使龐籍劾奏振畏懦不出故坐貶自金明陷敗
安遠塞門二寨在金明之北振旣不能救安遠遂棄之
又移書塞門寨主高延德曰可守則守不可守宜拔兵
民以歸延德城守將半歲振卒不救乃率眾棄城敵據

險邀之與眾皆沒

振移書延德此據記聞趙振本傳稱

始必徑進吾傷夷之後宜固守然慮諸城不能如吾謀

苟延州勿支則陝西未可量此天下安危之機幸賊百

日寇塞門按吾備已固不然驟至吾方以五月陷之兵未嘗

去而復來也范雍以二月攻圍塞門至五月安州振即自環

州代雍度其至延州必三月間而塞門以五月振至延州

未一月塞門之陷振在延州已一月餘傳乃謂振至延州

州守備未固恐兵出誘賊賊復驟至城下故不敢救塞

門所云以大易小者振藉口爾而使臣猥信之且著論

力爲振地今不取但略

存振語使後世有考焉

庚午御延和殿閱諸軍習戰陣上封者言諸軍止教坐
作進退雖整肅可觀然臨敵難用請自今遣官閱陣畢
令解鎧以弓弩射營置弓三等自一石至八斗弩四等
自二石八斗至二石五斗以次閱習詔行之陝西河東
河北路又詔教士不祗金革緩急不足以應敵自今諸

續資治通鑑長編卷一百二十一
五
軍各予鎧甲十馬甲五合迭披帶又命諸軍班聽習雜

武技勿輒禁止

此據本志附見

布衣呂渭李元振姚嗣宗皆上封事陳方略召試學士
院王申並授幕職官知縣渭真定人元振京兆人嗣宗
華人也陝州言陝西副都部署兼緣邊招討副使耀
州觀察使夏隨卒隨始受命上面諭曰方以邊事委卿
毋得以父在機密爲嫌時隨已病或勸須疾愈乃行隨
曰邊事方急可以疾辭乎及卒贈昭信節度使諡壯恪
遣中使護喪隨頗好儒學多從士大夫游雖在邊無戰
功亦自嚴重寡過云

乙亥太常博士陝西河東制置青白鹽使薛宥爲監察
御史時陝西都轉運使龐籍薦宥經度西鹽且請假要

官以重其事朝廷既從其請因詔諸路自今毋得薦人求換御史前保信行軍司馬范諷爲將作少監知淮陽軍

丙子宮苑使達州刺史河北安撫使高志甯爲西上閤門使知滄州初命志甯經度河北諸州軍城池爲戰守備旣而議者恐契丹寢有所疑故罷之

韓琦墓誌云本道有嫉志甯統

制者故有此言
今但從實錄

戊寅皇子初賜名昕授檢校太尉忠正節度使封壽國公置旌節于資善堂命端明殿學士李淑典其書奏故事皇子封國公食邑三千戶食實俸一千戶而中書誤封一千戶實封三百戶翌日詔當制學士貼麻改正之是月以龍神衛四廂都指揮使眉州防禦使涇原副都

經義通考卷一百一十八
六
部署葛懷敏爲捧日天武四廂都指揮使鄜延副都部
署

八月癸未朔命翰林學士兼龍圖閣學士晁宗慤右驥

驥使象州防禦使入內都知王惟忠齎手詔至永興軍

與夏竦等議邊事

宗慤傳云關中宿師久以宗慤安撫陝西與夏竦議攻守策實錄乃無安撫之命

當考

乙酉太常丞田況爲陝西經略安撫司判官試校書郎

胡瑗爲丹州軍事推官經略安撫司勾當公事況從夏

竦瑗從范仲淹之辟也

詔京朝官徙益梓利夔四路

而父母老疾或謀葬者許權入近地監當賜修金明

等寨役卒緡錢

丁亥詔諸路罪人多犯徒情理重選少壯者刺配永興

軍牢城候及三百人選置軍校團爲威捷指揮教閱武藝分隸逐路部署司以備前鋒有能效命者加拔擢之又詔鄜延路諸兵戍守日久者令番休

戊子改贈劉平爲朔方節度使石元孫爲定難節度使前贈忠武忠正皆非化外鎮凡初除節度使必先厯化外故也

癸巳遣西京左藏庫副使段微明往視渭州房村埽及回河廟南催墊隄岸仍規度修塞工料以聞陝西經略安撫副使韓琦言緣邊部署鈐轄下指揮使臣每禦敵皆臨時分領兵馬而不經訓練服習將未知士之勇怯士未知將之威惠以是數至敗衄昨諸班中選武藝優者爲寨主監押然拘于一城未能各適其用欲下陝

西都部署司分所試中人鄜延路十五員環慶涇原秦鳳路各十員爲逐路教押軍陣以士卒所習精麤重行賞罰如此則老懦者不能自容勇壯者各思奮身復免主將爭占精兵專爲己衛也又臨敵取勝必有奇兵若併力出攻則所向皆潰今士卒非無驍果膽力出于儕類緣分在逐指揮每指揮不過三二十人與中常之兵混而爲一禦敵之際勢分力寡多爲懦卒所累雖欲挺身奮擊其可得乎欲乞委臣與范仲淹龐籍等分路于屯駐駐泊并本土所領禁軍內選馬上使鋤刀槍槊鐵鞭鐵簡棍棒勇力過人者爲平羌指揮以五百人爲額其衣糧如龍衛而立驍捷之上鄜延環慶涇原秦鳳四路各置兩指揮本路士兵一指指揮屯駐泊兵士一指

揮鄜延路屯延州鄜州環慶路屯環州慶州涇原路屯
涇州鎮戎軍秦鳳路並屯秦州若已請龍衛以上請受
者卽以之爲節級若後來人闕卽選試殿前馬步軍司
龍衛以下諸指揮武藝有勇力者補填之本路土兵止
選就糧指揮其選中屯駐泊兵士聽三年一代仍令
諸州軍揭榜以募投平羌者送經略司揀試給禁軍例
物外別給錢十千絹十匹無馬者以牡馬給之詔都部
署司相度以聞

家傳云從之
今據實錄

乙未刑部員外郎知制誥蘇紳爲契丹國母生辰使西
京左藏庫副使向傳範副之傳範敏中子也右正言知
制誥吳育爲契丹主生辰使東頭供奉官閣門祇候馮
載副之右正言梁適爲契丹國母正旦使西染院副使